

皇明常熟縣文獻志卷之十二

邑人管一德士恒編次

紀載志小序

成弘以前士大夫習爲古文辭者多沿勝國不能力
追左國先秦然其言簡直而近實正嘉以後始彬彬
矣然其辭藻麗而近虛惟所記建置沿革與夫山川
形勝城池寺觀人物名宦之蹟總不可廢也余採名
賢著述有關常熟者載若干篇而繁雜者稍芟去之
藏諸芸臺芸閣抑亦文獻之一證乎

記類

尊經閣記

吳訥

常熟縣學首創于宋之至和而重建于端平初左廟
右學大成殿後有言公祠祠右有明倫堂正統元年
丙辰縣令上虞郭南撤堂新之越三載又撤兩齋改
爲重屋并市學東民地重建射圃以便諸生習射辛
酉冬教諭浚儀趙永言建議郡庠舊有六經閣吳庠
近建藏書樓本庠舊有 高皇帝頒降大明曆等書
暨 文皇帝五經四書大全等集俱置廡下地土卑

濕塵兩蒸浥倘得樓閣以藏庶垂永永是時掌縣事者縣丞新建陳澄也聞而善之廼撤堂後寢屋捐俸爲倡復勸邑人攸助錢米鳩工市材建閣五間二夾室名曰尊經之閣縣令郭南以公出歸因捐俸完其未備經始壬戌季秋旣望落成嘉平之月哉生明之日而教諭永言請爲之記因言讀諸碑記心竊有疑宋寧宗慶元己未徽國朱子爲知縣孫應時記言公祠後二十八載理宗端平丙申魏文靖公了翁爲知縣王爚作新建學宮記惓惓然表章朱子記文之說

至篇終引禮書云時人以典禮質問者十有四皆以游一言爲可否三代典章之遺賴以有存此朱子未言者若記中所謂南方之學得其精華及一洒輪儒無廉耻嗜飲食之譏此二事文靖公未嘗發明幸併開釋以告後學於戲訥蚤游邑庠親明倫堂扁左刻新安朱熹書右刻稽陰王爚立稍長讀丹陽公祠堂記竊有得其一二焉按隋書儒林傳序云南北所爲章句南人約簡得其精華故朱子記稱子游簡易疎通高暢宏達意必敏於聞道豈非所謂得其精華者

自古而然耶又按荀况非十二子篇云媮懦憚事無廉耻嗜飲食是子游氏之儒朱子於是引而不辨夫子游聖門高弟論學知大學之本治武城知禮樂之道豈有如荀况所議者乎荀去子游幾二百載其時弟子鄉人或狃於習俗遂乃議及子游故朱子記云願諸生勉進所謂本所謂道使此邑之人百世之下復有如公者出一洗媮懦憚事無廉耻嗜飲食之譏期望後學至深切矣夫高皇帝卽位之初詔天下立學校遴儒師訓迪子弟其後設科取士以四書五

經爲主諸所註釋訂定率皆朱子之說迨 文皇帝
命儒臣纂輯大全凡悖朱子者弗錄今作閣記舍朱
子之言何以爲言哉朱子嘗言道原于天命之性行
于君臣父子兄弟夫婦朋友之間其文出聖人之手
存于易書詩禮春秋孔孟之籍凡天地陰陽事物之
理脩齊治平之道禮樂選舉食貨兵刑之制靡不備
著于中自昔師以是教弟以是學今學者類多記誦
剽竊內以傲其父兄外以驕其閭里終身不知自勉
而卒就小人之歸然豈專學者之罪亦典教者不知

所以教之之道也於戲今之爲師爲弟子者可不以朱子之言爲法爲戒以無負國家建學毓賢之意乎昔者張伯玉記吾郡六經閣曰諸子百家皆在而不書尊經也夫尊者恭敬奉持之謂豈徒尊閣奉安而已抑又惟吾邑山水明秀登閣則一覽在目竊恐輕俊少年罔思天朝祖宗頒降經書在上或張讌于其上下或酣鬻之餘追逐笑嬉非惟墮乎相鼠無禮之惡抑亦墮乎嗜飲食無廉耻之賤矣凡我鄉邑後進其慎之哉若夫本武城絃歌之政推廣學道愛人

之心是又師帥之職也愚于此有深望云

濟農倉記

張洪

理財正辭孔聖之心見于易預防患難周公之志形于詩道雖極隆時雖極治亦必以財爲養民之本理財之道備然後防患之慮周故堯湯之世水旱不能爲之凶惟我高皇帝臨御萬方修復古聖王之道樂歲粒米狼戾則歛而藏諸民間凶歲則發以賑之行之旣久下民弗虔名存實廢聖天子惕然念之乃於宣德五年分命六卿巡撫天下郡縣爰是工部

右待郎廬陵周公來旬來宣以惠南國歷巡江南諸
郡惟蘇松常之賦比他郡相爲倍蓰壤地不過二千
里而京師百萬之衆恃之以供物產人力宜其竭矣
當春夏之交農民之力畎畝而餽粥不繼禾勉出加
倍之息資之富人富人與之若投餌穀始登場則勾
取其子本以僅存之餘供倍蓰之賦不足又舉而償
之是以常賦未充甑釜已無烟矣公達旦不寐思所
以援之之策七年秋會 詔旨以庫藏之儲平糴及
勸富人出粟以待凶荒公與郡守況公同心同力以

全活窮民爲已任出庫儲糴米三萬石勸借富人九萬石樽節漕運浮費五萬石搜剔豪右侵占絕戶田租一十二萬石通二十九萬石分貯六縣每縣置倉六十間常熟貯米五萬餘石增置倉四十間共百間總曰濟農倉蓋以農爲天下本蘇松之農又爲京邑本耳明年夏江南大旱民無食輟耕待斃公發濟農米賑之困瘁者出死力以挽枯槁者潤澤焦卷者始芘芘矣適遇海舶自諸蕃回供費浩繁庫藏赤字公私洶洶懼弗克供公以濟農米廩食之民不知

若遠海軍士乏食公從容指畫餽餉相繼軍民蘇息
宜少安矣公方竭心勞思以營來歲之計稽考民間
所入之賦去其浮費三分之一民受實惠銘刻心骨
既而常賦充足又收羨餘得精糧三十二萬蓋取豪
右侵漁之資非加賦也又增貯六縣倉獨常熟居其
三分之一益倉廩四十間通一百四十間廉隅整飭
結構完固工不告勞民不知費何其敏歟公知人善
任使命常熟主簿郭南專理賦稅南亦盡心而爲之
防慮周密纖悉無遺滌塲之月賦已告完自洪武初

至今未之有也倉廩既成糧米充積居人過客相率造于舊史氏之廬請紀其實予按太公立九府圜法所以權輕重之宜使農末相資無甚貴甚賤之貨而常平義倉實記始于此得聖人理財之遺意今以濟農爲名則所重在農農重則本固本固則百度舉常平義倉之制亦行乎其中矣且使農民知其爲我而設雖有旱乾水溢有所恃以不恐一事而兼衆美此之謂也斯倉之建其引而不替哉

常熟縣重建城隍廟記

吳詢

昔在太祖高皇帝恭膺天命作四海神人之主爰
念元季綱淪法斲祀典瀆糝不經馴致禍災荐起民
罹塗炭迺屢厯曆思建立制度正名定分爲萬世成
憲若郡邑城隍廟亦其一也初洪武元年戊申詔
封天下城隍神在應天府者以帝在開封臨濠太平
府和滁二州者以王在凡府州縣者以公以侯以伯
時常熟循元制爲州得封城隍神曰鑒察司民城隍
靈祐侯二年己酉州改爲縣三年庚戌詔定獄鎮

海濱俱依山水本稱城隍神號一體改正仍頒格式
蓋造廟宇屏去閑雜及泥塑神像于是改題木主曰
常熟縣城隍之神知縣田義以舊廟在縣西十步者
基地湫隘改造于西隅袁繡坊北卽今廟是也四年
辛亥特勅郡邑里社各設無祀鬼神壇以城隍神
主祭鑒察官吏人民善惡以貽福禍未幾復降儀註
新官赴任必先謁廟與神立誓期在陰陽表裏以安
下民祝詞儀註出自宸衷聖謨洋洋發明福善禍淫
之機以警飭下臣至矣然吾邑建廟垂七十餘載朽

蠹剝落日就頽圯今知縣事郭南俱無以揭虔安靈
躬損捧貲以爲衆倡僚屬吏民相與協助乃市材趣
工經始于正統庚申十月落成于次年二月堂寢門
廡宏壯軒豁視昔有加適予致政歸老者耆民時璩龔
鼎等相率謁文垂示永久予惟古昔聖帝明王罔不
以事神治民爲先務城隍之神經典弗載蓋後人因
其保障民生以義而起也迨宋姚鉉編唐文粹始載
乾元中李陽冰縉雲城隍祠記然無所謂封爵配位
也及元草廬先生吳澄記江州城隍廟後殿則曰江

右列郡以漢潁陰侯灌嬰配食豈侯嘗定豫章諸郡
而然歟自後繁蕪日甚 聖明統御窮神知化始遂
更正歷歲云久或罔克遵今吾邑得賢令屏除土偶
鼎建祠宇將見神罔怨悃物無疵癘邑人之幸豈淺
淺哉詩曰不愆不忘率由舊章後之作邑君子暨鄉
邦士民尚其鑒茲

義役倉記

張洪

古之役民歲不過三日蘇威父蘇綽仕於西魏以國用不足征賦頗重旣而嘆曰今所爲者正如張弓後之君子誰能弛乎威聞其言每以爲已任至隋文帝時威爲納言奏減賦役人每歲不過三十日後國用充足益寬徭役自唐至於汴宋役弊未興南宋土窄人稠師旅數起國用不足征役浩繁弊由之生長民者始爲義役之舉矣縣之役有押錄手分貼書書司廳子牢子市巡斗級攔頭務司直司等名其目二十